



## ԱՎԱՐՏԱԾԱՌԵՐԻ ԲԱՆԱՎՈՐ ՊԱՇՏՊԱՆՈՒԹՅՈՒՆ ՀՈԳԵՎՈՐ ԾԵՄԱՐԱՆՈՒՄ

Մայիսի 18-ին, շաբաթ օրը, ժամը 12-ին, հոգևոր ճեմարանի հանդիսությունների դահլիճում տեղի ունեցավ 1974—75 ուսումնական տարվա հոգևոր ճեմարանի շրջանավարտներ Հակոբ սրկ. Խաչատրյանի և Հակոբ սրկ. Գլընճյանի ավարտաճառների բանավոր պաշտպանությունը՝ Մայր տաճարի լուսարարապետ տ. Հուսիկ եպս. Սանթրոյանի նախագահության ներքո:

Հանդիսությունը ներկա էին Մայր Աթոռի դիվանապետ տ. Արսեն եպս. Բերբերյանը, միաբանությունը, հոգևոր ճեմարանի դասախոսական կազմն ու ուսանողությունը և մայրավանքի աշխատանքային բաժնի վարիչները:

Հանդիսությունը բացվեց խմբովին երգված Տերունական աղոթքով:

Քննիչ հանձնաժողովը, որի կազմում էին հոգևոր ճեմարանի դասախոսներ Արթուր Հատիտյանը, Պարզ Ծախագյանն ու Սամվել Անթոնյանը, նախապես առանձին քննության առնելով ներկայացված ավարտաճառերը, տեսչության միջոցով միջնորդություն էին հարուցել Վեհափառ Հայրապետի մոտ՝ շրջանավարտներին հանդես գալու համար իրենց ավարտաճառների բանավոր պաշտպանությամբ:

Ներկայացված դիպլոմային աշխատանքների մասին հանձնաժողովի գեկուցագրից հետո, խոսք տրվեց շրջանավարտ սարկավագներին: Նրանցից յուրաքանչյուրը բանավոր պաշտպանության ժամանակ ներկայացրեց իր նյութը և պատասխանեց հանձնաժողովի ու ներկաների հարցերին:

Ընդմիջումից հետո քննող հանձնաժողովը արձանագրեց հետևյալ գնահատականները՝ շրջանավարտ սարկավագների ավարտաճառների համար:

**Հակոբ սրկ. Խաչատրյան.** ավարտաճառի թեման՝ «Հայերենի դերբայները և նրանց պատմական փոփոխությունները», 4 գլուխ, 55 մեքենագրված էջ. «Բավարար»:

**Հակոբ սրկ. Գլընճյան.** ավարտաճառի թեման՝ «Եկեղեցական կանոններն ու պատմությունը», 5 գլուխ, 45 մեքենագրված էջ. «Գերազանց»:

Այնուհետև տ. Հուսիկ եպս. Սանթրոյանը նախ իր շնորհավորական խոսքն ուղղեց շրջանավարտներին, ապա, հանուն Վեհափառ Հայրապետի, հանձնեց դիպլոմները:

Դիպլոմների հանձնումից հետո տ. Հուսիկ եպիսկոպոսը, հոգևոր ճեմարանի տեսուչ տ. Հովհաննես ավագ քհն. Մարտիրոսյանի հետ, շրջանավարտներին առաջնորդեց Վեհարան, ուր նրանք ներկայացան Վեհափառ հայրապետին: Նորին Սրբությունն իր գոհունակությունը հայտնեց Մայր Աթոռի երիտասարդ երկու սարկավագների այս հաջողության համար և հորդորեց նրանց վանական-միաբանական պարտականություններին զուգընթաց միշտ լինել նաև մտավոր աշխատանքի մարդ, երբեք չկրտրվել գիր ու գրականությունից, հոգեպես և իմացապես է՛լ ավելի զարգանալ, չհանգրտանալ ձեռք բերած հաջողություններով:

Այս առթիվ Վեհափառ Հայրապետը, իր

գնահատանքը հայտնելով, մեկական ժամացույց նվիրեց շրջանավարտ սարկավագներին՝ թելադրելով, որ գնահատեն ժամանակի արժեքը և իրենց պարտականությունները կանոնավորեն ժամացույցի ճշգրտությամբ, ժամանակի ճշմարիտ ըմբռնումով:

«Էջմիածին» ամսագրի խմբագրությունը ևս շնորհավորում է հոգևոր ճեմարանի շրջանավարտներ Հակոբ արկ. Խաչատրյանին և հակոբ արկ. Գրիգորյանին ու մաղթում, որ նրանք լինեն Մայր Աթոռին և Վեհափառ Հայրապետին արժանի միաբաններ ու զավակներ:

